

## Yr Adolygiad o Dirluniau Dynodedig yng Nghymru

### Cylch Gorchwyl

Mae Gweinidogion Cymru eisiau sicrhau bod tirluniau dynodedig yn barod i wynebu'r heriau presennol a'r heriau yn y dyfodol, a'u bod yn dod yn enghreifftiau a gydnabyddir yn rhyngwladol ar gyfer cynaliadwyedd. Maent wedi comisiynu'r adolygiad hwn er mwyn ystyried a fydd y trefniadau presennol yn cyflawni'r amcanion hyn ac, os na fyddant, pa newidiadau ddylid eu gwneud er mwyn eu cyflawni. Bydd yr adolygiad yn ymgysylltu â'r cyhoedd a rhanddeiliaid tirluniau dynodedig er mwyn archwilio, casglu ac asesu'r dystiolaeth gysylltiedig â dynodiad, pwrpas, nod a dull llywodraethu tirluniau dynodedig yng Nghymru.

Bydd yr adolygiad yn cael ei rannu'n ddau gam. Bydd cam un yn edrych ar y dynodiadau eu hunain a bydd cam dau yn dilyn, gan archwilio'r trefniadau llywodraethu ar gyfer y tirluniau dynodedig yng ngoleuni argymhellion y cam cyntaf i Weinidogion Cymru.

#### *Cam Un*

- y manteision o gategoreiddio tirluniau dynodedig Cymru o dan un math o ddynodiad.
- pwrpas y tirluniau dynodedig hyn.

#### *Cam Dau*

- trefniadau llywodraethu a rheoli'r tirluniau dynodedig hyn.
- sut byddai unrhyw gorff/gyrff rheoli yn y dyfodol yn hybu cydweithredu a gweithio ar y cyd yn y ffordd orau, gan osgoi dyblygu.
- sut byddai unrhyw gorff rheoli yn y dyfodol yn cadarnhau atebolrwydd a phenderfyniadau lleol yn y ffordd orau.

Yn y tymor canolig i'r tymor hir, mae'n rhaid i'r trefniadau newydd alluogi i unrhyw gorff/gyrff sy'n rheoli ein tirluniau dynodedig yn y dyfodol ddatblygu a gwella eu galluedd strategol, llunio polisi a chyflawni gweithredol ymhellach, gan arwain at y canlynol

- i. Cyflawni pwrpas tirluniau dynodedig.
- ii. Sicrhau bod rhinweddau arbennig tirlun dynodedig yn cael eu gwarchod.
- iii. Gwneud y gorau o botensial yr ardaloedd hyn.
- iv. Cefnogi cais Rheoli Cyfoeth Naturiol.
- v. Dangos arferion da, yn enwedig o ran rheolaeth a chynaliadwyedd tirluniau.
- vi. Datblygu ffyrdd clir a chyson o gydweithredu.
- vii. Sicrhau arweiniad cenedlaethol a'r defnydd mwyaf effeithiol o adnoddau.
- viii. Osgoi dyblygu a gwneud y defnydd gorau posib o arbenigedd prin.
- ix. Cadarnhau atebolrwydd a phenderfyniadau lleol.

Nid yw Gweinidogion Cymru wedi penderfynu eto ar safbwynt ynghylch a ddylai Awdurdodau'r Parciau Cenedlaethol gadw swyddogaethau cynllunio. Gwneir penderfyniad ar wahân ynghylch hynny. Bydd Cam 2 yr adolygiad yn ystyried hynny ar ôl dod i benderfyniad.

## **Adolygiad o Dirweddau Dynodedig yng Nghymru**

### **Cam Un**

#### **Rhagair**

Mae dau fath o dirwedd ddynodedig yn cyfrif am oddeutu chwarter Cymru. Mae ugain y cant o'r dirwedd yn Barciau Cenedlaethol ac mae'r pump y cant sy'n weddill yn Ardaloedd o Harddwch Naturiol Eithriadol. Mae'r ddau ddynodiad yn hanu o Ddeddf Parciau Cenedlaethol a Mynediad i Gefn Gwlad 1949. Mae dau ddiben statudol i Barciau Cenedlaethol:

- gwarchod a gwella o harddwch naturiol yr ardal, ei bywyd gwyllt a'i threftadaeth ddiwylliannol,
- hybu cyfleoedd i'r cyhoedd ddeall a mwynhau rhinweddau arbennig yr ardal.

Un pwrpas statudol sydd i Ardaloedd o Harddwch Naturiol Eithriadol, sef:

- gwarchod a gwella harddwch naturiol yr ardal.

Gellir dweud bod gwahanol "haenau" i Barciau Cenedlaethol ac Ardaloedd o Harddwch Naturiol Eithriadol yn y drefn tirweddau dynodedig. Mae hyn oherwydd nifer o ddibenion statudol, maint daearyddol a threfniadau llywodraethu.

Yr un statws sydd i Barciau Cenedlaethol ac Ardaloedd o Harddwch Naturiol Eithriadol yn nhermau harddwch eu tirwedd a'u golygfeydd. Mae hyn yn cael ei nodi ym mhwynt 5.3.6 o Bolisi Cynllunio Cymru.

Mae'r ddyletswydd gyfreithiol ar "awdurdodau perthnasol" Parciau Cenedlaethol (o dan adran 62(2) o Ddeddf yr Amgylchedd 1995) a'r ddyletswydd gyfreithiol sydd ar awdurdodau perthnasol Ardaloedd o Harddwch Naturiol Eithriadol (o dan adran 85(1) o Ddeddf Cefn Gwlad a Hawliau Tramwy 2000) yn union yr un fath.

Mae Parciau Cenedlaethol ac Ardaloedd o Harddwch Naturiol Eithriadol yn denu miloedd o ymwelwyr bob blwyddyn ac yn wynebu'r un math o bwysau amgylcheddol, economaidd a chymdeithasol.

Hefyd, mae'r tirweddau dynodedig yn bodloni safonau sy'n cael eu cydnabod yn rhyngwladol. Mae'r Undeb Rhyngwladol dros Gadwraeth Natur yn cydnabod dau fath o dirweddau dynodedig fel ardaloedd gwarchodedig Categori 5.

Yn y dyfodol, disgwylir y bydd tirweddau dynodedig yn rheoli adnoddau naturiol ac yn ceisio cyrraedd y chwe nod llesiant a nodir ym Mil Llesiant Cenedlaethau'r Dyfodol (Cymru):

<b>Nod</b>	<b>Disgrifiad</b>
<b><i>Cymru lewyrchus.</i></b>	Economi arloesol a chynhyrchiol, gydag allyriadau carbon isel, sy'n defnyddio adnoddau yn fwy effeithlon a chymesur; ac sy'n cynhyrchu cyfoeth ac yn darparu cyfleoedd am gyflogaeth ar gyfer poblogaeth fedrus ac addysgedig.
<b><i>Cymru gydnerth.</i></b>	Amgylchedd naturiol bioamrywiol gydag ecosystemau iach gweithredol sy'n cynorthwyo cydnerthedd cymdeithasol, economaidd ac ecolegol ynghyd a'r gallu i addasu i newid.
<b><i>Cymru iachach.</i></b>	Cymdeithas lle mae llesiant corfforol a meddyliol pobl cystal â phosibl a lle deellir dewisiadau ac ymddygiadau sydd o fudd i iechyd yn y dyfodol.
<b><i>Cymru sy'n fwy cyfartal.</i></b>	Cymdeithas sy'n galluogi pobl i gyflawni eu potensial ni waeth beth fo'u cefndir neu eu hamgylchiadau.
<b><i>Cymru o gymunedau cydlynus.</i></b>	Cymunedau atyniadol, hyfyw, diogel sydd â chysylltiadau da.
<b><i>Cymru a diwylliant bywiog lle mae'r Gymraeg yn ffynnu.</i></b>	Cymdeithas sy'n hyrwyddo ac yn gwarchod diwylliant, treftadaeth a'r Gymraeg, ac sy'n annog pobl i gyfranogi yn y celfyddydau, a chwaraeon a gweithgareddau hamdden.

Mae pum mlynedd a thrigain wedi mynd heibio ers i'r ddeddfwriaeth a greodd y dynodiadau gwreiddiol gael Cydsyniad Brenhinol. Mae Gweinidogion Cymru am sicrhau bod ein tirweddau dynodedig yn ddigon cydnerth i fodloni'r heriau presennol a heriau'r dyfodol, gan gadw'u hynodrydd a datblygu'n enghreifftiau rhyngwladol o gynaliadwyedd.

Mae Llywodraeth Cymru wedi comisiynu adolygiad i ystyried p'un a yw'r trefniadau presennol yn mynd i gyflawni'r nodau hyn, ac os nad ydynt yn ddigonol, pa newidiadau a ddylid eu gwneud er mwyn eu cyflawni. Yng nghwrs yr adolygiad, cynhelir trafodaethau â'r cyhoedd a rhanddeiliaid tirweddau dynodedig er mwyn casglu tystiolaeth mewn perthynas â dynodi tirweddau dynodedig yng Nghymru, eu diben, eu nod a'r ffordd y maent yn cael eu llywodraethu, archwilio'r dystiolaeth honno a'i hasesu.

Rhennir yr adolygiad yn ddwy ran. Bydd Cam Un yn edrych y posibilrwydd o alinio'r dynodiadau a'u dibenion, a Cham Dau yn edrych ar drefniadau llywodraethu tirweddau dynodedig yng Nghymru. Bydd trywydd y cwestiynau yng Ngham Dau yn cael eu datblygu yng ngoleuni'r argymhellion a gyflwynir i Weinidogion Cymru ar ddiwedd Cam Un.

## Cwestiynau ar gyfer Cam Un

<b>1</b>	<b>A yw'r tirweddau dynodedig yn gallu bodloni anghenion presennol Cymru a'i hanghenion yn y dyfodol?</b>
	<p><i>Wrth ymateb i'r cwestiwn hwn meddyliwch am y pwyntiau isod:</i></p> <p>Cryfderau a gwendidau'r system bresennol o ran dibenion tirweddau dynodedig a'r dyletswyddau statudol presennol sy'n ymwneud a hwy.</p> <p>Yr heriau a'r cyfleoedd posibl sy'n wynebu tirweddau dynodedig Cymru.</p> <p>P'un a yw'r dibenion statudol presennol ar gyfer tirweddau dynodedig neu'r dyletswyddau statudol sydd ar gyrrff rheoli yn gallu mynd i'r afael â'r heriau presennol sy'n eu hwynebu yn ogystal â'r heriau a fydd yn eu hwynebu yn y dyfodol.</p> <p>P'un a oes angen dibenion newydd neu ddibenion diwygiedig i wella potensial arloesol tirluniau dynodedig.</p> <p>Enghreifftiau o ddibenion statudol/deddfwriaethol arloesol a/neu nodau tirweddau dynodedig y tu allan i Gymru.</p>
<b>2</b>	<b>A ddylai bod un dynodiad ar gyfer tirweddau gwarchodedig yng Nghymru?</b>
	<p><i>Wrth ymateb i'r cwestiwn hwn meddyliwch am y pwyntiau isod:</i></p> <p>Manteision ac anfanteision y system bresennol o ddwy haen ar gyfer dynodi tirwedd yn statudol gan fod rhai agweddau ar y dynodiadau presennol fwy neu lai'n union yr un fath.</p> <p>P'un a fyddai un dynodiad yn gwneud y defnydd gorau o adnoddau ac arbenigedd prin; yn fwy effeithlon ac yn gwella cydweithio a chydlyniant ledled Cymru, gan barhau i roi'r un lefel o warchodaeth i'r tirweddau dynodedig hyn.</p> <p>Y goblygiadau o gael un dynodiad o ran y safonau cenedlaethol a rhyngwladol ar gyfer tirwedd a chadwraeth.</p> <p>Eich profiad chi/profiad eich sefydliad mewn perthynas ag un o'r dynodiadau neu'r ddau ddynodiad.</p> <p>Enghreifftiau o alinio dynodiadau y tu allan i Gymru a'r gwersi sydd i'w dysgu.</p>

